

Tico Croes: falta liderazgo Promer Ministro Oduber

Aumento prijs di pan ta refleha ambiente nobo

ORANJESTAD(AAN)-- Den e nueve lunanan cu Gabinete Oduber ta na mando por sinti un cambio total den comunidad. Esaki a worde treci dilanti pa e Miembro di Parlamento pa MEP, Tico Croes.

El a papia di un inseguridad cu ta reina cerca poblacion, cu no sa kico e por spera, mientras

e Promer Ministro, Nelson Oduber, no ta duna señal di liderazgo. No tin claridad unda Gobierno kier bay y con kier saca e pais for di e confusion, cu ta reina actualmente.

E colmo de los colmos ta e aumento di prijs di pan cu diez cent. Tico Croes a indica cu aki ta trata di aumento di prijs di un producto basico.

El a muestra cu durante e tres añanan di Gobernacion di AVP, a pesar di e hecho cu Aruba a pasa den un crisis economico, nunca tabata necesario pa aumenta prijs di pan. Mas bien tempo di Gabinete Eman a crea cupo di trabao, como parti di e desaroyonan economico, cu a tuma lugar.

Tico Croes a papia di intrankilidad den mundo di panaderonan. El a muestra cu awor Pueblo mester scucha cu su dirigentenan ta bisa cu mester bay busca placa pa fia den exterior, mientras Aruba a perde 25 Mil turista, cu tabata bini cu barconan. E promocion turistico di Aruba na Europa a duna señalnan di fayó y un

Ministro ta ofende henter un Pueblo, cu ta worde califica di ta biba di placa di droga, sin cu Ministro Presidente ta sali na defensa di Pueblo.

Mientrastanto accionnan di Gabinete Oduber a haci cu Aruba a worde poni ariba e promer puesto di e lista peligroso di Douane Mericano. Gabinete Oduber a laga trahadornan di Alhambra y Bouwmaatschappij ariba caya ora mas nan tabata tin mester di sosten y asistencia di Gobierno. Ministro di Finanzas, Guillermo Trinidad, no a sali na defensa di institucionnan importante y nan directornan, manera Banco Central. Ministro di Justicia, Hendrik Croes, a laga Procurador General na caya.

Tico Croes a muestra tambe cu a pesar di e hecho cu AVP a laga tur cos cla pa ehecuta, te ainda Gabinete Oduber no a honra igual pago pa igual trabao.

E Miembro di Parlamento a señala cu ya no tin cerca Pueblo e optimismo y confianza mas cu Gabinete Eman a laga atras. E colmo ta e aumento di prijs di pan cu Diez Cent, cu a keda introduci sin previo aviso na publico. Un decision, cu ta mishi especialmente cu esnan di menos recurso, cu mester tambe di nan pan di cada dia.